

四庫全書

史部

欽定四庫全書

元史卷八十

明翰林學士亞中大夫知制誥兼修國史宋濂等修

志第三十

輿服三

儀衛

殿上執事

挈壺郎二人掌直漏刻冠學士帽服紫羅窄袖衫塗金

求帶烏鞞漏刻直御榻南 司香二人掌侍香以主服

御者

國語曰舒庫爾齊

攝之冠服同挈壺香案二在漏刻東西

稍南司香侍案側東西相向立 酒人凡六十主酒

國語

曰達刺齊

二十人主湏

國語曰哈刺齊

二十人主膳

國語曰博囉齊

二十人

冠唐帽服同司香酒海直漏南酒人北面立酒海南

護尉四十人以質子在宿衛者攝之

質子國語曰圖魯齊

冠交角

幘頭紫梅花羅窄袖衫塗金束帶白錦汗胯帶弓矢佩

刀執骨朶分立東西宇下 警蹕三人以控鶴衛士為

之冠交角幘頭服紫羅窄袖衫塗金束帶烏靴捧立于露階每乘輿出入則鳴其鞭以警衆

殿下執事

司香二人亦以主服御者攝之冠服同殿上司香香案

直露階南司香東西相向立護尉凡四十人以戶郎

國語

曰巧
總齊

二十人質子二十人攝之服同宇下護尉夾立階

凡右階之下伍長凡六人都點檢一人右點檢一人

左點檢一人凡宿衛之人及諸門者戶者皆屬焉

如集賢
台巴爾

鳴齊巧德齊之類是也

殿內將軍一人凡殿內佩弓矢者佩刀者

諸司禦者皆屬焉

如和爾齊伊勒都齊之類是也

殿外將軍一人宇下

護尉屬焉宿直將軍一人黃麾立仗及殿下護尉屬焉

右無常官凡朝會則以近侍重臣攝之服白帽白衲襖

行膝履襪或服其品之公服恭事則侍立舍人授以骨

朶而易笏都點檢以玉右點檢以瑪左點檢以水精

殿內將軍以瑪瑙殿外將軍以水精宿直將軍以金

左階之下伍長凡三人殿內將軍一人殿外將軍一人

宿直將軍一人冠服同右恭事則侍立舍人授以骨朶
而易笏殿內將軍以瑪瑙殿外將軍以水精宿直將軍
以金 司辰郎二人一人立左樓上服視六品候時北
面而難唱一人立樓下服視八品候時捧牙牌趨丹墀
跪報露階之下左黃麾仗內設表案一禮物案一與士
凡八人每案四人前二人冠纁金額交角幘頭緋錦寶
相花窄袖襖塗金束帶行滕鞋襪後二人冠服同前惟
襖色青 園人十人

國語曰
阿都齊

冠唐巾紫羅窄袖衫青錦

緣白錦汗胯銅束帶烏靴馭立仗馬十覆以青錦緣緋
錦鞍複分左右立黃麾仗南侍儀使二人引進使一

人通班舍人一人尚引舍人一人閱仗舍人一人奉引
舍人一人先與舍人一人糾儀官凡四人尚書一人侍
郎一人監察御史二人知班三人視班內失儀者白糾
儀官而行罰焉皆東向立右仗之東以北為上侍儀
使二人引進使一人承奉班都知一人宣表目舍人一
人宣表修撰一人宣禮物舍人一人奉表舍人一人奉

幣舍人一人尚引舍人一人閱仗舍人一人奉引舍人
一人先與舍人一人押禮物官凡二人工部侍郎一人
禮部侍郎一人糾儀官凡四人尚書一人侍郎一人監
察御史二人知班三人視班內如左右輦路宣輦舍人
一人通贊舍人一人戶部二人在承傳贊席前皆西向
立左仗西以北為上凡侍儀使引進使尚書侍郎御史
各服其本品之服承奉班都知舍人借四品服知班冠
展角幘頭服紫羅窄袖衫塗金束帶烏靴 護尉三十

人以質子在宿衛者攝之立大明門闌外冠服同字下
護尉 承傳二人控鶴衛士為之立大明門楹間以承
傳于外仗冠服同警蹕執金柄小骨朶

殿下黃麾仗

黃麾仗凡四百四十有八人
分布于丹墀左右各五行

右前列執大蓋二人執華蓋二人執紫方蓋二人執紅
方蓋二人執曲蓋二人冠展角幘頭服緋純生色寶相
花袍勒帛烏靴 次二列執朱圓扇八人執大雉扇八
人執中雉扇八人執小雉扇八人執朱圓扇八人冠武

弁服同前執蓋者 次三列執黃麾幡十人武弁青純
生色寶相花袍青勒帛烏靴執絳引幡十人武弁緋純
生色寶相花袍緋勒帛烏靴執信幡十人冠服同上其
色黃執傳教幡十人冠服同上其色白執告止幡十人
冠服同上其色紫 次四列以下執葆蓋四十人武弁
服緋純生色寶相花袍勒帛烏靴執儀鎗斧四十人冠
服同上其色黃執小戟蛟龍掌四十人冠服同上其色
青左列亦如之皆以北為上押仗四人行視仗內而檢

校之冠服同警蹕者

殿下旗仗

旗仗執引屏凡五百一十有八人分左右以列

左前列建天下太平旗第一牙門旗第二每旗執者一人護者四人皆五色緋巾五色純生色寶相花袍勒帛雲頭靴執人佩劍護人加弓矢後屏五人執稍朱纓鑿朱甲雲頭靴左二列日旗第三龍君旗第四每旗執者一人護者四人後屏五人中服執佩同前列右前列建皇帝萬歲旗第一牙門旗第二每旗執者一人護

者四人後屏五人巾服執佩同左前列 右二列月旗
第三虎君旗第四每旗執者一人護者四人後屏五人
巾服執佩同前列 左次三列青龍旗第五執者一人
黃純巾黃純生色寶相花袍勒帛花靴佩劍護者二人
朱白二色純巾二色純生色寶相花袍勒帛花靴佩劍
加弓矢天王旗第六執者一人巾服同上護者二人青
白二色純巾二色生色寶相花袍勒帛花靴佩劍加弓
矢後屏五人執稍朱纛螯朱甲雲頭靴風伯旗第七執

者一人護者二人後屏五人巾服佩執同天王旗雨師
旗第八執者一人護者二人後屏五人巾服佩執同青
龍旗雷公旗第九執者一人巾服佩同上護者二人青
紫二色純巾二色純生色寶相花袍勒帛花靴佩劍加
弓矢後屏五人執稍白氍毹白甲雲頭靴電母旗第十
執者一人護者二人後屏五人巾服執佩同風伯旗吏
兵旗第十一執者一人護者二人巾服執佩同雷公旗後
屏五人執稍黃氍毹黃甲雲頭靴 右次三列白虎旗

第五執者一人黃純巾黃純生色寶相花袍勒帛花靴
佩釵護者二人青朱二色純巾二色純生色寶相花袍
勒帛花靴佩釵加弓矢後屏五人執稍朱纓蓋朱甲雲
頭靴天王旗第六執者一人巾服同上護者二人青白
二色純巾二色純生色寶相花袍勒帛花靴佩釵加弓
矢後屏五人執稍朱纓蓋朱甲雲頭靴江瀆旗第七執
者一人護者二人後屏五人巾服執佩同天王旗河瀆
旗第八執者一人巾服佩同上護者二人青紫二色純

巾二色純生色寶相花袍勒帛花靴佩釧加弓矢後屏
五人執稍黃堦蓋黃甲雲頭靴淮瀆旗第九執者一人
巾服佩同上護者二人青朱二色純巾二色純生色寶
相花袍勒帛花靴佩釧加弓矢後屏五人巾服執佩同
白虎旗濟瀆旗第十執者一人巾服佩同上護者二人
朱白二色純巾二色純生色寶相花袍勒帛花靴佩釧
加弓矢後屏五人執稍青堦蓋青甲雲頭靴力士旗第
十一執者一人護者二人後屏五人巾服佩執同河瀆

旗二十二旗內拱衛直指揮使二人分左右立服本品
朝服執玉斧次卧瓜一列次立瓜一列次列絲一列冠
纓金額交角幘頭緋錦寶相花窄袖襖塗金荔枝束帶
行膝履襪次鎧仗一列次斧一列次吾仗一列次班劍
一列並分左右立冠纓金額交角幘頭青錦寶相花窄
袖襖塗金荔枝束帶行膝履襪 左次四列朱雀旗第
十二執者一人黃純巾黃純生色寶相花袍勒帛花靴
佩劍護者二人青白二色純巾二色純生色寶相花袍

勒帛花靴佩劍加弓矢後屏五人執稍朱纁鑿朱甲雲
頭靴木星旗第十三執者一人巾服佩同上護者二人
青朱二色純巾二色純生色寶相花袍勒帛花靴佩劍
加弓矢後屏五人執稍青纁鑿青甲雲頭靴纁惑旗第
十四執者一人巾服佩同上護者二人青紫二色純巾
二色純生色寶相花袍勒帛花靴佩劍加弓矢後屏五
人巾服執佩同朱雀旗土星旗第十五執者一人護者
二人巾服佩同纁惑旗後屏五人執稍黃纁鑿黃甲雲

頭靴太白旗第十六執者一人護者二人巾服佩同木
星旗後屏五人執稍白兜鍪白甲雲頭靴水星旗第十
七執者一人護者二人巾服佩同太白旗後屏五人執
稍紫兜鍪紫甲雲頭靴鸞旗第十八執者一人巾服佩
同上護者二人朱白二色純巾二色純生色寶相花袍
勒帛花靴佩劍加弓矢後屏五人巾服執同木星旗
右次四列玄武旗第十二執者一人黃純巾黃純生色
寶相花袍勒帛花靴佩劍護者二人朱白二色純巾二

色純生色寶相花袍勒帛花靴佩釵加弓矢後屏五人
紫兜鍪紫甲雲頭靴執稍東嶽旗第十三執者一人護
者二人巾服佩同玄武旗後屏五人執稍青兜鍪青甲
雲頭靴南嶽旗第十四執者一人巾服佩同上護者二
人青白二色純巾二色純生色寶相花袍勒帛花靴佩
釵加弓矢後屏五人執稍朱兜鍪朱甲中嶽旗第十五
執者一人巾服同上護者二人紫青二色純巾二色
純生色寶相花袍勒帛花靴佩釵加弓矢後屏五人執

稍黃兜鍪黃甲雲頭靴西嶽旗第十六執者一人巾服
佩同上護者二人朱青二色純巾二色純生色寶相花
袍勒帛花靴佩劍加弓矢後屏五人執稍白兜鍪白甲
北嶽旗第十七執者一人護者二人巾服佩同南嶽旗
後屏五人巾服執同玄武旗麟旗第十八執者一人護
者二人後屏五人巾服執佩同西嶽旗左次五列角
宿旗第十九亢宿旗第二十氐宿旗第二十一房宿旗
第二十二心宿旗第二十三尾宿旗第二十四箕宿旗

第二十五每旗執者一人黃純巾黃純生色寶相花袍
勒帛花靴佩劍護者二人青朱二色純巾二色純生色
寶相花袍勒帛花靴佩劍加弓矢後屏五人青兜鍪青
甲執稍 右次五列奎宿旗第十九婁宿旗第二十胃
宿旗第二十一昂宿旗第二十二畢宿旗第二十三觜
宿旗第二十四參宿旗第二十五每旗執者一人黃純
巾黃純生色寶相花袍勒帛花靴佩劍護者二人青朱
二色純巾二色純生色寶相花袍勒帛花靴佩劍加弓

矢後屏五人執稍白兕螯白甲 左次六列斗宿旗第

二十六牛宿旗第二十七女宿旗第二十八虛宿旗第

二十九危宿旗第三十室宿旗第三十一壁宿旗第三

十二每旗執者一人黃純巾黃純生色寶相花袍勒帛

花靴佩劔護者二人朱白二色純巾二色純生色寶相

花袍勒帛花靴佩劔加弓矢後屏五人執稍紫兕螯紫

甲 右次六列井宿旗第二十六鬼宿旗第二十七柳

宿旗第二十八星宿旗第二十九張宿旗第三十翼宿

旗第三十一軫宿旗第三十二每旗執者一人黃純巾
黃純生色寶相花袍勒帛花靴佩劍護者二人朱白二
色純巾二色純生色寶相花袍勒帛花靴佩劍加弓矢
後屏五人執稍朱兕鍔朱甲

宮內導從

警蹕三人以控鶴衛士為之並列而前行掌鳴其鞭以

警衆

服見前

天武二人執金鉞分左右行金兕鍔金甲

威金素汗胯金束帶烏雲靴 舍人二人服視四品

主服御者凡三十人

針庫爾齊也

執骨朶二人執幢二人執

節二人皆分左右行攜金盆一人由左負金椅一人由

右攜金水餅鹿盧二人由左執巾一人由右捧金香毬

二人捧金香合二人皆分左右行捧金唾壺一人由左

捧金唾盃一人由右執金拂四人執升龍扇十人皆分

左右行冠交角幘頭服紫羅窄袖衫塗金束帶烏靴

臂正齊官一人由中道近侍重臣攝之侍儀使四人分

左右行佩弓矢十人

國語曰和爾齊

分左右由外道行服如

主服御者 佩寶刀十人

國語曰伊勒都齊

分左右行冠鳳翅

唐巾服紫羅窄線襖金束帶烏鞞

中宮導從

舍人二人引進使二人中政院判二人同簽中政院事

二人簽中政院事二人中政院副使二人同知中政院

事二人中政院使二人皆分左右行各服其本品公服

內侍二人分左右行服視四品 押直二人冠交角幘

頭紫羅窄袖衫塗金束帶烏靴小內侍凡九人執骨朶

二人執藻蓋四人皆分左右行執繖一人由中道行攜
金盃一人由左負金椅一人由右服紫羅團花窄袖襖
冠帶靴如押直 中政使一人由中道捧外辦象牌服
本品朝服 宮人凡二十二人攜水瓶金鹿盧一人由
右執銷金淨巾一人由左捧金香毬二人捧金香合二
人分左右捧金唾壺一人由左捧金唾盂一人由右執
金拂四人執雉扇十人各分左右行冠鳳翅縷金帽銷
金緋羅襖銷金緋羅結子銷金緋羅繫腰紫羅衫五色

金黃雲肩瓊玉束帶

進發冊寶

清道官二人警蹕二人並分左右皆攝官服本品朝服
雲和樂一部署令二人分左右次前行戲竹二次排
簫四次蕭管四次板二次歌四並分左右前行內琵琶
十二次第十六次篳篥十六次簫十六次方響八次頭
管二十八次龍笛二十八為三十三重重四次杖鼓三
十為八重次板八為四重板內大鼓二工二人舁八人

樂工服並與鹵簿同法物庫使二人服本品服次朱團
扇八為二重次小雉扇八次中雉扇八次大雉扇八分
左右為十二重次朱團扇八為二重次大繖二次華蓋
二次紫方繖二次紅方繖二次曲蓋二並分左右執繖
扇所服並同立仗 圓子頭一人中道次圓子八人分
左右服與鹵簿內同 安和樂一部署令二人服本品
服札鼓六為二重前四後二次和鼓一中道次板二分
左右次龍笛四次頭管四並為二重次羌管二次笙二

並分左右次雲璈一中道次纂二分左右樂工服與鹵簿內同 繖一中道椅左踏右執人皂中大團花緋錦襖金塗銅束帶行膝鞋襪 拱衛使一人服本品服舍人二人次引寶官二人並分左右服四品服 香案中道與士控鶴八人服同立仗內表案與士侍香二人分左右服四品服 寶案中道與士控鶴十有六人服同香案與士方輿官三十人夾香案寶案分左右而趨至殿門則控鶴退方輿官昇案以陞唐巾紫羅窄袖衫

金塗銅束帶烏靴 引冊二人四品服 香案中道與
士控鶴八人服同寶案興士侍香二人分左右服四品
服 冊案中道興士控鶴十有六人服同寶案興士方
興官三十人夾香案冊案分左右而趨至殿門則控鶴
退方興官昇案以陞中服與寶案方興官同 蓀蓋四
十人次闋仗舍人二人服四品服次小戟四十人次儀
鎧四十人夾雲和樂繖扇分左右行服同立仗 拱衛
使二人服本品朝服次班劍十次梧杖十二次斧十二

次鐙仗二十次列絲十皆分左右次水瓶左金盃右次
列絲十次立瓜十次金杙左鞭桶右蒙鞍左繖手右次
立瓜十次卧瓜三十並夾蓀蓋小戟儀鎧分左右行服
並同鹵簿內 拱衛外舍人二人服四品服引導冊諸
官次從九品以上次從七品以上次從五品以上並本
品朝服 金吾折衝二人牙門旗二每旗引執五人次
青稍四十人赤稍四十人黃稍四十人白稍四十人紫
稍四十人並兜鍪甲靴各隨稍之色行道冊官外 冊

案後舍人二人服四品服次太尉右司徒左次禮儀使
二人分左右次舉冊官四人右舉寶官四人左次讀冊
官二人右讀寶官二人左次閣門使四人分左右並本
品服知班六人分左右服同立仗往來視諸官之失
儀者而行罰馬

冊寶攝官

上尊號冊寶凡攝官二百十有六人奉冊官四人奉寶
官四人捧冊官二人捧寶官二人讀冊官二人讀寶官

三人引冊官五人引寶官五人典瑞官五人糾儀官四人殿中侍御史二人監察御史四人閤門使三人清道官四人點試儀衛五人司香四人備顧問七人代禮三十人拱衛使二人押仗二人方輿一百六十人上皇太后冊寶凡攝官百五十人攝太尉一人攝司徒一人禮儀使四人奉冊官二人奉寶官二人引冊官二人引寶官二人舉冊官二人舉寶官二人讀冊官二人讀寶官二人捧冊官二人捧寶官二人奏中殿一人主當內

侍十人閣門使六人充內臣十三人糾儀官四人代禮
官四十二人掌謁四人司香十二人折衝都尉二人拱
衛使二人清道官四人警蹕官四人方輿官百二十人
太皇太后冊寶攝官同前 授皇后冊寶凡攝官百
八十人攝太尉一人攝司徒一人主節官二人禮儀使
四人奉冊官二人奉寶官二人引冊官二人引寶官二
人舉冊官二舉寶官二人讀冊官二人讀寶官二人內
臣職掌十人宣徽使二人閣門使二人代禮官三十七

人侍香二人清道官四人折衝都尉二人警蹕官四人
中宮內臣九人糾儀官四人接冊內臣二人接寶內臣
二人方輿官七十四人 授皇太子冊凡攝官四十九
人攝太尉一人奉冊官二人持節官一人捧冊官二人
讀冊官二人引冊官二人攝禮儀使二人主當內侍六
人副持節官五人侍從官十一人代禮官十六人

班序

先期侍儀使糾庀陳設 殿內兩楹北香案二 殿門

內殿內將軍版位二其外殿外將軍版位二字下斜界
護尉版位二軒溜前斜外出畫白蓮六右點檢版位三
左宣徽版位三蓮南一步橫列鳴鞭版位三左右階南
兩隅天武版位二字下左右第二第三重斜界導從版
位二 殿東門兩碩斜界出導從二道三層各圍十五
先扇鉞各五寶蓋鉞各二 殿東階下各圍十直至東
門階下為回倒導從位 正階下二十四甃香案一護
尉席內各祀迤內第四螭首取直邊北左右護尉第五

席相向布席北二席宿直次殿中次典瑞次起居每席
函丈五尺 殿前版位八各以左右祀道內邊丹墀迤
內第五甃縱直北空路五丈五尺東西走路各遠四丈
九尺中布席四十席函九尺設護尉版位二 輦路東
西各五道表二丈一仞五寸南北二道廣丈有奇北至
道當中第一北三南一自兩端各函六丈第二北起十
一各函丈咫南起九各函丈三尺第三北起十六各函
丈五尺南起十二各函丈五寸第四北起十六各函丈

二尺南起十四各函丈九尺第五北起同上南起各函
八尺北頭曲尺路內四各函九尺設黃麾仗錡二百二
十仗南畫闌約丈許左右同中央置席設尚廐版位二
仗內丹墀橫界一十八道道函五尺縱引橫引三丈
中設九品版位一十八尚廐南左右縱畫各一十八道
道函俱左右向設起居旁折版位三十六以內為上
大明門中兩楹外斜界二道護尉版位二外設管旗版
位二門下左右闕邊各六丈南北各畫一道廣一引七

大一仞六寸空各二丈一仞內橫二引二丈五寸空各
三丈五尺每騎後丈五尺屏風渠一道長五尺坐各違
四壁丈五尺設矛旗騎七十四闕下兩觀內各六丈縱
各界一十八道道違俱左右設外序班版位三十六自
序班北入闕左右門邊兩外仗往北折西至月華門東
至日精門道中央至起居旁折界一道導引

元史卷八十

元史卷八十考證

視班內如右左輦路 右訛左下句左訛右今據殿前
入班圖改永傳贊席前上脫在字據明殿版位圖增
天王旗第六 白虎以下原本闕天王旗一條今按續
集禮補入人按集禮及經世大典證仗下加次斧一
列句第五南起下加十字曲尺路內下加四字

--	--	--	--	--	--	--	--

欽定四庫全書

元史卷八十一

明翰林學士亞中大夫知制誥兼修國史宋濂等修

志第三十一

選舉一

選舉之法尚矣成周庠序學校以鄉三物教萬民而賓興之舉於鄉升於司徒司馬論定而後官之兩漢有賢良方正孝弟力田等科或奉對詔策事猶近古隋唐有

秀才明經進士明法明算等科或兼用詩賦士始有棄
本而逐末者宋大興文治專尚科目雖當時得人為盛
而其弊遂至文體卑弱士習委靡識者病焉遼金居北
方俗尚弓馬遼景宗道宗亦行貢試金太宗世宗屢闢
科場亦屢得士元初太宗始得中原輒用耶律楚材
言以科舉選士世祖既定天下王鶚獻計許衡立法事
未果行至仁宗延祐間始斟酌舊制而行之取士以德
行為本試藝以經術為先士褒然舉首應上所求者皆

彬彬輩出矣然當時仕進有多歧銓衡無定制其出身
於學校者有國子監學有蒙古字學回回國學有醫學
有陰陽學其策名於薦舉者有遺逸有茂異有求言有
進書有童子其出於宿衛勲臣之家者待以不次其用
於宣徽中政之屬者重為內官文蔭叙有循常之格而
超擢有選用之科由直省侍儀等入官者亦名清望以
倉庾賦稅任事者例視冗職捕盜者以功叙入粟者以
資進至工匠皆入班資而與隸亦躋流品諸王公主寵

以投下俾之保任遠夷外徵授以長官俾之世襲凡若此類殆所謂吏道雜而多端者歟矧夫儒有歲貢之名吏有補用之法曰掾史令史曰書寫銓寫曰書吏典吏所設之名未易枚舉曰省臺院部曰路府州縣所入之途難以指計雖名卿大夫亦往往由是躋要官受顯爵而刀筆下吏遂致竊權勢舞文法矣故其銓選之備考覈之精曰隨朝外任曰省選部選曰文官武官曰考數曰資格一毫不可越而或援例或借資或優陞或回降

其縱情破律以公濟私非至明者不能察焉是皆文繁
吏弊之所致也今採摭舊編載於簡牘或詳或畧條分
類聚殆有不勝其紀述者姑存一代之制作選舉志

科目

太宗始取中原中書令耶律楚材請用儒術選士從之
九年秋八月下詔令斷事官扎哈岱與山西東路課稅
所長官劉中歷諸路考試以論及經義詞賦分為三科
作三日程專治一科能兼者聽但以不失文義為中選

其中選者復其賦役令與各處長官同署公事得東平楊英等凡若干人皆一時名士而當世或以為非便事復中止世祖至元初年有旨命丞相史天澤條具當行大事嘗及科舉而未果行四年九月翰林學士承旨王鶚等請行選舉法述述周制次及漢隋唐取士科目近舉遼金選舉用人與本朝太宗得人之効以為貢舉法廢士無入仕之階或習刀筆以為吏胥或執僕役以事官僚或作技巧販鬻以為工匠商賈以今論之惟科舉

取士最為切務矧先朝故典尤宜追述奏上帝曰此良法也其行之中書左三部與翰林學士議立程式又請依前代立國學選蒙古人諸職官子孫百人專命師儒教習經書俟其藝成然後試用庶幾勲舊之家人材輩出以備超擢十一年十一月裕宗在東宮時省臣復啓謂去年奉旨行科舉今將翰林老臣等所議程式以聞奉令旨准蒙古進士科及漢人進士科參酌時宜以立制度事未施行至二十一年九月丞相和爾果斯與留

夢炎等言十一月中書省臣奏皆以為天下習儒者少而由刀筆吏得官者多帝曰將若之何對曰惟貢舉取士為便凡蒙古之士及儒吏陰陽醫術皆令試舉則用心為學矣帝可其奏繼而許衡亦議學校科舉之法罷詩賦重經學定為新制事雖未及行而選舉之制已立至仁宗皇慶二年十月中書省臣奏科舉事世祖裕宗累嘗命行成宗武宗尋亦有旨今不以聞恐或有沮其事者夫取士之法經學實修己治人之道詞賦乃摘章

繪句之學自隋唐以來取人專尚詞賦故士習浮華今
臣等所擬將律賦省題詩小義皆不用專立德行明經
科以此取士庶可得人帝然之十一月乃下詔曰惟我
祖宗以神武定天下世祖皇帝設官分職徵用儒雅崇
學校為育材之地議科舉為取士之方規模宏遠矣朕
以眇躬繼承丕祚繼志述事祖訓是式若稽三代以來
取士各有科目要其本末舉人宜以德行為首試藝則
以經術為先詞章次之浮華過實朕所不取爰命中書

參酌古今定其餘制其以皇慶三年八月天下郡縣興
其賢者能者充貢有司次年二月會試京師中選者朕
將親策焉具合行事宜于后科場每三歲一次開試舉
人從本貫官司於諸色戶內推舉年及二十五以上鄉
黨稱其孝悌朋友服其信義經明行修之士結罪保舉
以禮敦遣貢諸路府其或徇私濫舉并應舉而不舉者
監察御史肅政廉訪司體察究治考試程式蒙古色目
人第一場經問五條大學論語孟子中庸內設問用朱

氏章句集註其義理精明文辭典雅者為中選第二場
策一道以時務出題限五百字以上漢人南人第一場
明經經疑二問大學論語孟子中庸內出題並用朱氏
章句集註復以己意結之限三百字以上經義一道各
治一經詩以朱氏為主尚書以蔡氏為主周易以程氏
朱氏為主已上三經兼用古註疏春秋許用三傳及胡
氏傳禮記用古疏註限五百字以上不拘格律第二場
古賦詔誥章表内科一道古賦詔誥用古體章表四六

參用古體第三場策一道經史時務內出題不矜浮藻
惟務直述限一千字以上或蒙古色目人願試漢人南
人科目中選者加一等注授蒙古色目人作一榜漢人
南人作一榜第一名賜進士及第從六品第二名以下
及第二甲皆正七品第三甲以下皆正八品兩榜並同
所在官司遲悞開試日期監察御史肅政廉訪司糾
彈治罪 流官子孫廕叙並依舊制願試中選者優陞
一等 在官未入流品願試者聽若中選之人已有九

品以上資級比附一高加一等注授若無品級止依試
例從優銓注鄉試處所并其餘條目命中書省議行於
戲經明行修庶得真儒之用風移俗易益臻至治之隆
咨爾多方體予至意中書省所定條目 鄉試中選者

各給解據錄取中科文行省移咨都省以送禮部腹裏
宣慰司及各路闕申禮部拘該監察御史廉訪司依上
錄連科文中臺轉呈都省以憑照勘 鄉試八月二十
日蒙古色目人試經問五條漢人南人明經經疑二問

經義一道二十三日蒙古色目人試策一道漢人南人
古賦詔誥章表内科一道二十六日漢人南人試策一
道 會試省部依鄉試例於次年二月初一日試第一
場初三日第二場初五日第三場 御試三月初七日
前期奏委考試官二員監察御史二員讀卷官二員於
殿廷考試每舉子一名集賽岱一人看守漢人南人試
策一道限一十字以上成蒙古色目人時務策一道限
五百字以上成 選考試官行省與宣慰司及腹裏各

路有行臺及廉訪司去處與臺憲官一同商議選差上
都大都從省部選差在內監察御史在外廉訪司官一
員監試每處差考試官同考試官各一員並於見任并
在閒有德望文學常選官內選差彌封官一員謄錄官
官一員廉幹文資正官充之凡謄錄試卷并行移文字
皆用朱書仍須設法闕防毋致容私作弊省部會試都
省選委知貢舉同知貢舉官各一員考試官四員監察
御史二員彌封謄錄對讀官監門等官各一員 鄉試

行省一十一河南陝西遼陽四川甘肅雲南嶺北征東
江浙江西湖廣宣慰司二河東山東直隸省部路分四
真定東平大都上都 天下選合格者三百人赴會試
於內取中選者一百人內蒙古色目漢人南人分卷考
試各二十五人蒙古人取合格者七十五人大都十五
人上都六人河東五人真定等五人東平等五人山東
四人遼東五人河南五人陝西五人甘肅三人嶺北三
人江浙五人江西三人湖廣三人四川一人雲南一人

征東一人色目人取合格者七十五人大都十人上都
四人河東四人東平等四人山東五人真定等五人河
南五人四川三人甘肅二人陝西三人嶺北二人遼陽
二人雲南二人征東一人湖廣七人江浙一十人江西
六人漢人取合格者七十五人大都一十人上都四人
真定等十一人東平等九人山東七人河東七人河南
九人四川五人雲南二人甘肅二人嶺北一人陝西五
人遼陽二人征東一人南人取合格者七十五人湖廣

一十八人江浙二十八人江西二十二人河南七人

鄉試會試許將禮部韻畧外餘並不許懷挾文字差搜
檢懷挾官一員每舉人一名差軍一名看守無軍人處
差巡軍 提點擗掠試院差廉幹官一員度地安置席
舍務令隔遠仍自試官入院後常川妨職監押外門

鄉試會試彌封謄錄對讀官下吏人於各衙門從便差
設 試卷不考格犯御名廟諱及文理紕繆塗注乙五
十字以上者不考謄錄所承受試卷並用朱書謄錄正

文實計塗注乙字數標寫對讀無差將朱卷逐旋送考試所如朱卷有塗朱乙字亦皆標寫字數謄錄官書押候考校合格中選人數已定抄錄字號索上元卷請監試官知貢舉官同試官對號開拆舉人試卷各人自備三場文卷并草卷各一十二幅於卷首書三代籍貫年甲前期半月於印卷所投納置簿收附用印鈐縱訖各選舉人凡就試之日日未出入場黃昏納卷受卷官送彌封所撰字號彌封訖送謄錄所科舉既行之

後若有各路歲貢及保舉儒人等文字到官並令還赴本鄉應試 倡優之家及患廢疾若犯十惡奸盜之人不許應試 舉人於試場內毋得喧譁違者治罪仍殿二舉 舉人與考試官有五服內親者自須迴避仍令同試官考卷若應避而不自陳者殿一舉 鄉試會試若有懷挾及令人代作者漢人南人有居父母喪服應舉者並殿二舉 國子監學歲貢生員及件讀出身並依舊制願試者聽中選者於監學合得資品上從優銓

注 別路附籍蒙古色目漢人大都上都恒產住經
年深者從兩都官司依上例推舉就試其餘去處冒貫
者治罪

知貢舉以下官會集至公堂議擬合行事目云 諸輒
於彌封所取問舉人試卷封號姓名及漏泄者治罪諸
試題未出而漏泄者許人告首諸對讀試卷官不躬親
而輒令人吏對讀其對讀訖而差誤有礙考校者有罰
諸謄錄人書寫不慎及錯誤有礙考校者重示責罰諸

官司故縱舉人私將試卷出院及應試人知而為傳送者許人告首諸監試官掌試院事不得干預考校諸試院官在廉內者不許與廉外官交語諸色人無故不得入試廳諸舉人謗毀上司率衆喧競不服止約者治罪諸舉人就試無故不冠及擅移坐次者或偶與親姻隣坐而不自陳者懷挾代筆傳義者並扶出諸折毀試卷首家狀者推治諸舉人於試卷書他語者駁放涉謗訕者推治諸試日為舉人傳送文書及因而受財者並許

人告諸舉人於別紙上起草者出榜退落諸科文內不得自叙苦辛門第委謄錄所點檢得如有違犯更不謄錄移文考試院出榜退落諸冒名就試別立姓名及受財為人懷挾代筆傳義者並許人告諸被黜而妄訴者治罪諸監門官譏察出入其物應入者拆封點檢諸巡捕官及兵役不得喧擾及輒視試文并縱容舉人無故往來非因公事不得與舉人私語諸試卷彌封用印訖以三不成字為號標寫仍於塗注乙處用印 每舉人

一名給祇應巡軍一人隔夜入院分宿席房試日擊鐘
為節一次院官以下皆盥漱二次監門官啓鑰舉人入
院搜檢訖就將解據呈納禮生贊曰舉人再拜知貢舉
官隔簾受一拜跪答一拜試官受一拜答一拜鐘三次
頒題就次日午賜膳其納卷者赴受卷所揖而退不得
交語受卷官書舉人姓名于歷舉人揖而退取解據
出院巡軍亦出至晚鳴鐘一次鎖院門第二場舉人入
院依前搜檢每十人一甲序立至公堂下作揖畢頒題

就次第三場如前儀 其受卷官具受到試卷逐旋關
發彌封官將家狀草卷腰封用印蒙古色目漢人南人分
卷以三不成字撰號每名累場同用一號於卷上親書
及於歷內標附訖牒送謄錄官置歷分給吏人並用朱
書謄錄正文仍具元卷塗注乙及謄錄塗注乙字數卷
朱書謄錄人姓名謄錄官具銜書押用印鈐縫牒送對
讀所翰林掾史具謄錄訖試卷總數呈報監察御史對
讀官以元卷與朱卷躬親對讀無差具銜書押呈解貢

院元卷發還彌封所各所行移並用朱書試卷照依元
號附簿 試官考卷知貢舉居中試官相對向坐公同
考校分作三等逐等又分上中下用墨筆批點考校既
定收掌試卷官於號簿內標寫分數知貢舉官同試官
監察御史彌封官公同取上元卷對號開拆知貢舉於
試卷家狀上親書省試第幾名拆號既畢應有試卷並
付禮部架閣貢舉諸官出院中書省以中選舉人分為
二榜揭于省門之左右 三月初四日中書省奏准以

初七日御試舉人於翰林國史院定委監試官及諸執
事初五日各官入院初六日譔策問進呈俟上采取初
七日執事者望闕設案於堂前置策題於上舉人入院
搜檢訖蒙古人作一甲序立禮生導引至於堂前望闕
兩拜賜策題又兩拜各就次色目人作一甲漢人南人
作一甲如前儀每進士一人差蒙古宿衛士一人監視
日午賜膳進士納卷畢出院監試官同讀卷官以所對
策第其高下分為三甲進奏作二榜用敕黃紙書揭于

內前紅門之左右 前一日禮部告諭中選進士以次日詣闕前所司具香案侍儀舍人唱名謝恩放榜擇日賜恩榮宴于翰林國史院押宴以中書省官凡預試官並與宴預宴官及進士並簪華至所居擇日恭請殿廷上謝恩表次日詣中書省參見又擇日諸進士詣先聖廟行舍菜禮第一人具祝文行事刻石題名於國子監

延祐二年春三月廷賜進士賜呼圖克岱爾張起巖等五十六人及第出身有差 五年春三月廷試進士

呼圖克岱爾霍希賢等五十人 至治元年春三月廷
試進士塔斯布哈宋本等六十四人 泰定元年春三
月廷試進士巴拉張益等八十六人 四年春三月廷
試進士阿恰齊李黼等八十有六人 天歷三年春三
月廷試進士圖烈圖王文煜等九十有七人 元統癸
酉科廷試進士同李齊等復增名額以及百人之數
稍異其制左右榜各三人皆賜進士及第其餘出身有
差科舉取士莫咸于斯後三年其制遂罷又七年而復

興遂稍變程式減蒙古色目人明經二條增本經義易
漢南人第一場四書疑一道為本經疑增第二場古賦
外於詔誥章表內又科一道此有元科目取士之制大
畧如此若夫會試下第者自延祐創設之初丞相特們
德爾阿薩爾及平章李孟等奏下第舉人年七十以上
者與從七品流官致仕六十以上者與教授元有出身
者於應得資品上稍優加之無出身者與山長學正受
省劄後舉不為例今有來遲不及應試者未曾區用取

旨帝曰依下第例恩勿著為格 泰定元年三月中書省臣奏下第舉人仁宗延祐間命中書省各授教官之職以慰其歸今當改元之初恩澤宜溥蒙古色目人年三十以上并兩舉而不第者與教授以下與學正山長漢人南人年五十以上并兩舉不第者與教授以下與學正山長先有資品出身者更優加之不願仕者令備國子員後勿為格從之自餘下第之士恩例不可常得間有試補書吏以登仕籍者惟已廢復興之後其法始

變下第者悉授以路府學正及書院山長又增取鄉試
備榜亦授以郡學錄及縣教諭於是科舉取士得人為
盛焉

學校

世祖至元八年春正月始下詔立京師蒙古國子學校
習諸生於隨朝蒙古漢人百官及集賢館官員選子弟
俊秀者入學然未有員數以通鑑節要用蒙古語言
譯寫教之俟生員習學成效出題試問觀其所對精通

者量授官職成宗大德十年春二月增生員廩餼通前三十員為六十員武宗至大二年定伴讀員四十人以及在籍上名生員學問優長者補之仁宗延祐二年冬十月以所設生員百人蒙古五十人色目二十人漢人三十人而百官子弟之就學者常不下二三百人宜增其廩餼乃減去庶民子弟一百一十四員聽陪堂學業於見供生員一百名外量增五十名元置蒙古二十人漢人三十人其生員紙扎筆墨止給三十人歲凡二次給

之至元六年秋七月置諸路蒙古字學十二月中書
省定學制頒行之命諸路府官子弟入學上路二人下
路二人府一人州一人餘民間子弟上路三十人下路
二十五人願充生徒者與免一身雜役以譯寫通鑑節
要頒行各路俾肄習之至成宗大德五年冬十月又定
生員散府二十人上中州十五人下州十人元貞元年
命有司割地給諸路蒙古學生員餼廩其學官至元十
九年定擬路府路設教授以國字在諸字之右府州教

授一任准從八品再歷路教授一任准正八品任回本
等遷轉大德四年添設學正一員上自國學下及州縣
舉生員高等從翰林考試凡學官譯史取以充焉

世祖至元二十六年五月尚書省臣言伊斯題喇卜文
字宜施於用今翰林院伊普迪哈魯鼎能通其字學乞
授以學士之職凡公卿大夫與夫富民之子皆依漢人
入學之制日肄習之帝可其奏是歲八月始置回回國
子學至仁宗延祐元年四月復置回回國子監設監官

以其文字便於闢防取會數目令依舊制篤意領教泰
定二年春閏正月以近歲公卿大夫子弟與夫凡民之
子入學者衆其學官及生員五十餘人已給飲膳者二
十七人外助教一人生員二十四人廩膳並令給之學
之建置在於國都凡百司庶府所設譯史皆從本學取
以充焉

太宗六年癸巳以馮志常為國子學總教命侍臣子弟
十八人入學世祖至元七年命侍臣子弟十有一人入

學以長者四人從許衡童子七人從王恂至二十四年立國子學而定其制設博士通掌學事分教三齋生員講授經旨是正音訓上嚴教導之術下考肄習之業復設助教同掌學事而專守一齋正錄申明規矩督習課業凡讀書必先孝經小學論語孟子大學中庸次及詩書禮記周禮春秋易博士助教親授句讀音訓正錄伴讀以次傳習之講說則依所讀之序正錄伴錄亦以次而傳習之次日抽籤令諸生復說其功課對屬詩章經

解史評則博士出題生員具藁先呈助教俟博士既定始錄附課簿以憑考校其生員之數定二百人先令一百人及伴讀二十人入學其百人之內蒙古半之色目漢人半之許衡又著諸生入學雜儀及日用節目七年命生員八十人入學俾永為定式而遵行之成宗大德八年冬十二月始定國子生蒙古色目漢人三歲各貢一人十年冬閏十月國子學定蒙古色目漢人生員二百人三年各貢二人武宗至大四年秋閏七月定生員

額二百人冬十二月復立國子學試貢法蒙古授官六
品色目正七品漢人從七品試蒙古生之法宜從寬色
目生宜稍加密漢人生則全科場之制仁宗延祐二年
秋八月增置生員百人陪堂生二十人用集賢學士趙
孟頫禮部尚書元明善等所議國子學貢試之法更定
之一曰陞齋等第六齋東西相向下兩齋左曰游藝右
曰依仁凡誦書講說小學屬對者隸焉中兩齋左曰據
德右曰志道講說四書課肆詩律者隸焉上兩齋左曰

時習右曰日新講說易詩書春秋科習明經義等程文者隸焉每齋員數不等每季考其所習經書課業及不違規矩者以次遞陞二曰私試規矩漢人驗日新時習兩齋蒙古色目取志道據德兩齋本學舉實歷坐齋二周歲以上未嘗犯過者許令充試限實歷坐齋三周歲以上以充貢舉漢人私試孟月試經疑一道仲月試經義一道季月試策問表章詔誥科一道蒙古色目人孟仲月各試明經一道季月試策問一道辭理俱優者為

上等準一分理優辭平者為中等準半分每歲終通計
其年積分至八分以上者陞充高等生員以四十名為
額內蒙古色目各十名漢人二十名歲終試貢員不必
備惟取實才有分同闕少者以坐齋月日先後多少為
定其未及等并雖及等無關未補者其年積分並不為
用下年再行積筭每月初二日蚤旦圓揖後本學博士
助教公座面引應試生員各給印紙依式出題考試不
許懷挾代筆各用印紙真楷書寫本學正錄彌封謄錄

餘並依科舉式助教博士以次考定次日監官覆考於名簿內籍記各得分數本學收掌以俟歲終通考三曰黜罰科條應私試積分生員其有不事課業及一切違戾規矩者初犯罰一分再犯罰二分三犯除名從學正錄糾舉正錄知見而不糾舉者從本監議罰之應已補高等生員其有違戾規矩者初犯殿試一年再犯除名從學正錄糾舉之正錄知見而不糾舉者亦從本監議罰之應在學生員歲終實歷坐齋不滿半歲者並行除

名除月假外其餘告假並不準筭學正錄歲終通行考校應在學生員蒙古色目別議外其餘以漢人生員三年不能通一經及不肯勤學者勒令出學其餘責罰並依舊規泰定三年夏六月更積分而為貢舉並依世祖舊制其貢試之法從監學所擬大槩與前法畧同而防閑稍加嚴密焉其本學正錄各二員司樂一員典籍二員管勾一員及侍儀舍人舊例舉積分生員充之後以積分既革於上齋舉年三十以上學行堪範後學者為

正錄通曉音律學業優贍者為司樂幹局通敏者為典
籍管勾其侍衛舍人與上中齋舉禮儀習熟音吐洪暢
曾掌春秋釋奠每月告朔明贊衆與其能者充之文宗
天歷三年春三月惟件讀員數自初二十人歲貢二人
後於大德七年定四十人歲貢六人至大四年定四十
人歲貢四人延祐四年歲貢八人為淹滯既願設四十
名宜充部令史者四人路教授者四人是後又命所貢
生員每大比選士與天下士同試於禮部策於殿廷又

增置備榜而加選擇焉

國初燕京始平宣撫王揖請以金樞密院為宣聖廟太宗六年設國子總教及提舉官命貴臣子弟入學受業憲宗四年世祖在潛邸特命修理殿廷及即位賜以玉帛俾永為祭器至元十三年授提舉學校官六品印遂改為大都路學署曰提舉學校所二十四年既遷都北城立國子學于國城之東廼以南城國子學為大都路學自提舉以下設官有差仁宗延祐四年大興府尹巴

蘇呼重修殿門堂廡建東西兩齋泰定三年府尹曹偉
增建環廊文宗天歷二年復增廣之提舉郝義恭又增
建齋舍自府尹郝都爾本至曹偉始定生員凡百人每
名月餼京畿漕運司及本路給之泰定四年夏四月諸
生始會食于學焉

太宗始定中原即議建學設科取士世祖中統二年始
命置諸路學校官凡諸生進修者嚴加訓誨務使成材
以備選用至元十九年夏四月命雲南諸路皆建學以

祀先聖二十三年二月帝御德興府行宮詔江南學校
舊有學田復給之以養士二十八年令江南諸路學及
各縣學內設立小學選老成之士教之或自願招師或
自受家學于父兄者亦從其便其他先儒過化之地名
賢經行之所與好事之家出錢粟贍學者並立為書院
凡師儒之命於朝廷者曰教授路府上中州置之命於
禮部及行省及宣慰司者曰學正山長學錄教諭路州
縣及書院置之路設教授學正學錄各一員散府上中

州設教授一員下州設學正一員縣設教諭一員書院
設山長一員中原州縣學正山長學錄教諭並授禮部
付身各省所屬州縣學正山長學錄教諭並受行省及
宣慰司劄付凡路府州書院設直學以掌錢穀從郡守
及憲府官試補直學考滿又試所業十篇陞為學錄教
諭凡正長諭錄教諭或由集賢院及憲臺等官舉充之
諭錄歷兩考陞正長正長一考陞散府上中州教授上
中州教授又歷一考陞路教授教授之上各省設提舉

二員正提舉從五品副提舉從七品提舉凡學校之事
後改直學考滿為州吏例以下第舉人充正長備榜舉
人充諭錄有薦舉者亦參用之自京學及州縣學以及
書院凡生徒之肄業於是者守令舉薦之臺憲考覈之
或用為教官或取為吏屬往往人材輩出矣 世祖中
統二年夏五月太醫院使王猷言醫學久廢後進無所
師授竊恐朝廷一時取人學非其傳為害甚大乃遣副
使王安仁授以金牌往諸路設立醫學具生員擬免本

身檢醫差占等役俟其學有所成每月試以疑難視其所對優劣量加勸懲後又定醫學之制設諸路提舉綱維之凡宮壺所需省臺所用轉入常調可任親民其從大醫院自遷轉者不得視此例又以示仕途不可以雜進也然太醫院官既受宣命皆同文武正官五品以上遷叙餘以舊品職遞陞子孫廕用同正班叙其掌藥充都監直長充御藥院副使陞至大使考滿依舊例於流官銓注諸教授皆從太醫院定擬而各路主善亦擬同

教授皆從九品凡隨朝太醫院醫官子弟及路府州縣學官並須試驗其各處名醫所述醫經文字悉從考校其諸藥所產性味真偽悉從辨驗其隨路學校每歲出降十三科疑難題目具呈太醫院發下諸路醫學令生員依式習課醫義年終置簿解納送本司以定其優劣焉

世祖至元二十八年夏六月始置諸路陰陽學其在腹裏江南若有通曉陰陽之人各路官司詳加取勘依儒

學醫學之例每路設教授以訓誨之其有術數精通者每歲錄呈省府赴都試驗果有異能則於司天臺內許令近侍廷祐初令陰陽人依儒醫例於路府州設教授一員凡陰陽人皆管轄之而上屬於太史焉

舉遺逸以求隱跡之士擢茂異以待非常之人世祖中統間徵許衡授懷孟路教官詔於懷孟等處選子弟之俊秀者教育之是年又詔徵金進士李治授翰林學士徵劉因為集賢學士不至又用平章咸寧王額森薦徵

蕭軒不起即授陝西儒學提舉至元十八年詔求前代
聖賢之後儒醫卜筮通曉天文厯數并山林隱逸之士
二十年復召拜劉因右贊善大夫辭不允未幾以親老
乞終養俸給一無所受後遣使授命于家辭疾不起二
十八年復詔求隱晦之士俾有司具以名聞成宗大德
六年徵臨川布衣吳澄擢應奉翰林文字拜命即歸九
年詔求山林間有德行文學識治道者遣使徵蕭軒且
曰或不樂於仕可試一來與朕語而遣歸至大三年復

召吳澄拜國子司業以病還延祐三年召拜集賢直學
士以疾不赴至治三年召拜翰林學士武宗仁宗累徵
蕭輿授集賢學士國子司業未赴改集賢侍講學士又
以太子右諭德徵始至京師授集賢學士國子祭酒諭
德如故仁宗延祐七年十一月詔曰比歲設立科舉以
取人材尚慮高尚之士晦跡丘園無從可致各處其有
隱居仁義才德高邁深明治道不求聞達者所在官司
具姓名牒報本道廉訪司覆奏察聞以備錄用又屢詔

求言於下使得進言於上雖指斥時政並無譴責往往
采擇其言任用其人列諸庶位以圖治功其他著書立
言裨益教化啓迪後人者亦斟酌錄用著為常式云

童子舉唐宋始著于科然亦無常員成宗大德三年舉
童子楊山童海童五年大都提舉學校所舉安西路張
秦山江浙行省舉張昇甫武宗至大元年舉武福安仁
宗延祐三年江浙行省舉俞傳豫馮和克六年河南路
舉張達罕學士鄂勒哲布哈舉丁旺溫七年河間縣舉

杜山童大興縣舉陳聃英宗至治元年福州路連江縣
舉陳元麟至治三年河南行省舉張英泰定四年福州
舉葉留聃文宗天歷二年舉杜夙靈至順二年制舉塔
台子塔位皆以其天資穎悟超出兒輩或能默誦
經文書常大字或能綴緝辭章講說經史並令入國子
學教育之惟張秦山精篆籀陳元麟能通性理葉留
聃問以四書大義則對曰無過事父母能竭其力事君
能致其身時人以遠大期之

元史卷八十一

元史卷八十一考證

選舉志一所入之途難以指計雖名卿大夫亦往往由是躋要官受顯封按大夫原刻訛大府今據永樂大典改

選舉志一諸巡捕官及兵役不得喧擾及輒視試文并縱容舉人無故往來按原刻捕訛鋪役訛級縱容二字倒置今據永樂大典改

選舉志一舉人揖而退按原刻脫舉字今據續通考

增

選舉志一延祐初令陰陽人依儒醫例於路府州設教

授一員按原刻本于員字上脫一字今據百官志

增

欽定四庫全書

史部
元史卷八十二

御史^臣徐如澍覆勘

總校官編修臣朱鈐

欽定四庫全書

元史卷八十二

明翰林學士亞中大夫知制誥兼修國史宋濂等修

志第三十三

選舉二

銓法上

凡集賽出身元初用左右宿衛為心膂爪牙故四集賽
子孫世為宿衛之長使得自舉其屬諸集賽歲久被遇

常加顯擢惟長官薦用則有定制至元二十年議久侍
禁閨門第崇高者初受朝命散官減職事一等否則量
減二等至大四年詔蒙古人降一等色目人降二等漢
人降三等

凡臺憲選用大德元年省議臺官舊無選法俱於民職
選取後互相保選省臺各為一選宜令臺官幕官聽自
選擇惟廉訪司官則省臺共選若臺官於省部選人則
與省官共議之省官於臺憲選人亦與臺官共議之至

元八年定監察御史任滿在職無異政元係七品以下者例加一等六品以上者陞擢其有不顧權勢彈劾非違及利國便民者別議陞除或有不稱者斟酌銓注凡選舉守令至元八年詔以戶口增田野闢詞訟簡盜賊息賦役均五事備者為上選九年以五事備者為上選陞一等四事備者減一資三事有成者為中選依常例遷轉四事不備者添一資五事俱不舉者黜降一等二十三年詔勸課農桑克勤奉職者以次陞獎其怠於

事者皆罷之二十八年詔路府州縣除達魯噶齊外長官並宜選用漢人素有聲望及勲臣故家并儒吏出身資品相應者佐貳官遴選色目漢人參用庶期於政平訟理民安盜息而五事備矣

凡進用武官至元十五年詔軍官有功而陞職者舊以其子弟襲職陣亡者許令承襲若罷去者以有功者代之十七年詔渡江總把百戶有功陞遷者總把依千戶降等承襲百戶無遞降職名則從其本等十九年奏擬

萬戶千戶百戶物故視其子孫堪承襲者依例承襲外
都元帥詔討使總管總把視其子孫堪承襲者止令管
其元軍元帥詔討子孫為萬戶總管子孫為千戶總把
子孫為百戶給元佩金銀符病故者降等惟陣亡者本
等承襲二十年詔萬戶千戶百戶分上中下三等定立
條格通行遷轉以三年為滿理算資考陞加品級若年
老病故者令其子弟依例廕叙是年以舊制父子相繼
管領元軍不設蒙古軍官故定立資考三年為滿通行

遷轉後各翼大小軍官俱設蒙古軍官又兼調遣征進俱已離翼難與民官一體遷轉廕叙合將萬戶千戶鎮撫自奏准日為始以三年為滿通行遷轉百戶以下不拘此例凡軍官征戰有功過者驗實跡陞降又定蒙古鄂囉官大翼萬戶下設鄂囉總管府從四品小翼萬戶下設鄂囉官從五品各千戶鄂囉亦設鄂囉官受院劄各千戶鄂囉不及一千戶者或二百戶三百戶以遠就近以小就大合併為千戶翼鄂囉官受院劄若干碍投

下難以合併宜再議之又定首領官受勅牒元帥詔討
司經歷知事就充萬戶府經歷知事換降勅牒如元翼
該革別與遷除若王令旨并行省劄付樞密院劄付經
歷充中下萬戶府知事行省諸司劄付充提領案牘并
各翼萬戶自設經歷知事一例俱作提控案牘受院劄
又議隨朝各衛千戶鎮撫所提控案牘已擬受院劄外
任各戶鎮撫所提控案牘合從行省許准受萬戶府付
身二十四年詔諸求襲其父兄之職者宜察其人而用

之凡舊臣勲閥及有戰功者其子弟當先任以小職若果有能則大用之二十五年軍官陣亡者本等承襲病故者降二等雖陣亡其子弟無能勿用雖病故其子弟果能不必降等於本等用之大德四年以上都虎賁司并武衛內萬戶千戶百戶達魯噶齊亡歿而無奏准承襲定例似為偏負今後各翼達魯噶齊亡歿宜察其子弟有能者用之無能則止五年詔軍官有不赴任者有患病因事不行者有已赴任被差委而出公事已辦為

私事稱故不迴者今後宜限以六月越限者以他人代之期年後以他職授之十一年詔色目鎮撫已歿其子有能依例用之子幼則取其兄弟之子有能者用之俟其子長即以其職還之至大二年議各衛翼首領官至經歷以上不得陞除似與官軍一體其子孫乃不得承襲今後年踰七十而散官至正從四品者宜正從五品軍官內任用四年詔軍官有故令其嫡長子繼嫡長子亡歿令嫡長孫為之嫡長孫亡歿則令嫡長孫之嫡長子

為之若嫡長俱無則以其兄弟之子相應者為之

太禧院天曆元年罷會福殊祥二院而立之秩正二品其所轄諸司則從其擢用

宣徽院皇慶二年省臣奏其所轄倉庫屯田官員半由都省半由本院用之奉旨宜俱從省臣用之

中政院至大四年言諸司錢糧選法悉令中書省掌之可更選人任用移文中書給降宣勅延祐七年院臣啓皇后位下中政院用人奉懿旨依樞密院御史臺等例

行之

直省舍人內則侍相臣之興居外則傳省聞之命令選宿衛及勲臣子弟為之又擇其高等二人專掌奏事至元二十五年省臣奏其充是職者俾受宣命大德八年擬歷六十月者始令從政

凡禮儀諸職有太常寺檢討至元十三年擬歷一百月除從八品有御史臺殿中司知班十五年擬歷九十月除正八品有通事舍人二十年議從本司選已入

流品職官為之考滿驗應得資品陞一等遷用未入流
官人員擬充侍儀舍人受中書省劄一考除從九品三
十年議於二品三品官子內選用不限廕叙兩考從七
品遷叙 有侍儀舍人三十年議於四品五品官子內
選用不限廕叙一考從九品大德三年議有闕宜令侍
儀司於到部正從九品流官內選用仍受省劄三十月
為滿依朝官內陞轉如不敷於應得府州儒學教授內
選用歷一考正九品叙 有禮直管勾大德三年省選

合用到部人員俱從太常寺舉保非常選除充者任迴
止於本衙門叙用 有郊壇庫藏都監二人至大三年
議受省劄者歷一考之上受部劄者歷兩考之上再歷
本院屬官一任擬於從九品內叙天歷二年擬在朝文
翰衙門於國子生貧內舉充

至元九年部議巡檢流外職任擬三十月為一考任迴
於從九品遷叙二十年議巡檢六十月陞從九品大德
七年議各處所委巡檢自立格月日為始已歷兩考之

上者循舊例九十月出職不及兩考者須歷一百二十
月方許出職遷轉十年省奏奉旨腹裏巡檢任回及考
者止於巡檢內注授所歷未及者於錢穀官內定奪通
理巡檢月日各處行省所設巡檢考滿者咨省定奪通
及考滿者行省於錢穀官等職內委用通理月日依舊
陞轉不及一考如係告廢并提控案牘例應轉充者於
雜職內委用考滿各理本等月日依例陞轉

腹裏諸路行用鈔庫至元十九年部擬州縣民官內選

充係八品九品人員三十月為滿任回驗元資品減一
資歷通理遷叙 庫使受都省割付任滿從優遷叙
庫副受本路割付二十月為滿於本處上戶內公選交
替 陝西四川西夏中興等路提舉司鈔庫俱係行省
管領合就令依上選擬庫官移文都省給降勅牒割付
省議除鈔庫副使咨各省選擬外提領省部選注 腹
裏官員二十六年定選充倉庫等官擬於應得資品上
陞一等通理月日陞轉 江南官員若曾腹裏歷仕前

資相應依例陞轉遷去江淮歷仕人員所歷月日一考之上者除一考准為根脚餘有月日後任通理不及考者添一資若選充倉庫等官擬於應得資品上例陞一考等任回依上於腹裏陞轉 接連官員選充倉庫等官應本地面從七品者准算腹裏從七資品歷過一考者為始理算月日後任通理一考之上餘有月日後任通理不及考者添一資陞轉 福建兩廣官員選充倉庫等官應得本地面從七品者准算江南從七資品歷過

一考者為始理算月日一考之上餘有月日後任通理
不及考者添一資陞轉 元係流官任回止於流官內
任用雜職者雜職內遷叙 萬億庫寶鈔總庫八作司
以一年滿代錢物甚多未易交割宜以二年為滿少者
以一年為滿 上都稅務官止依上例遷轉 都省所
轄去處二周歲為滿者各處都轉運使司官司屬官首
領官 各處都漕運使司官首領官 諸路寶鈔都提
舉司官 腹裏江南隨路平準行用庫官 印造寶鈔

庫官 鐵冶提舉司官首領官 採金提舉司官首領

官 銀場提舉司官首領官 新舊運糧提舉司官首

領官 都提舉萬億庫八作司寶鈔總庫首領官 一

周歲為滿者泉府司所轄富藏庫官 廩給司 四賓

庫 薄斂庫官 大都稅課提舉司官首領官 酒課

提舉司官首領官 提舉太倉官首領官 提舉醴源

倉官首領官 大都省倉官 河倉官 通州等處倉

官應受省部劄付管錢穀院務雜職等官 大都平準

行用庫官 燒鈔四庫官 抄紙坊官 幣源庫官

行省所轄去處二周歲為滿者各處都轉運使司官司

屬官首領官 各處都漕運使司官司首領官 行諸路

寶鈔都提舉司官 腹裏江南隨路平準行用庫官

甘州寧夏府等處都轉運使司官 市舶提舉司官首

領官 榷茶提舉司官司首領官 一周歲為滿者行泉

府司所轄阜通庫官 各處行省收支錢帛諸物庫官

三十年部議凡內外平準行用庫官提領從七品大

使從八品副使從九品若流官內選充者任回減一資
陞轉雜職人員止理本等月日 元貞二年部議凡倉
官有關於到選相應職官并諸衙門有出身令譯史通
事知印宣使奏差兩考之上人內選用依驗難易收糧
多寡陞等任回於應去地方遷叙 通州河西務李二
寺等倉官於應得資品上陞一等任滿交割別無短少
減一資通理 在都并城外倉分收糧五萬石之上倉
官於應得資品上陞一等任滿交割別無短少依例遷

叙收糧一萬石之上倉官止依應得品級除授任滿
交割別無短少減一資通理大德元年省擬大都萬
億四庫富寧庫寶鈔總庫上都萬億庫官止依合得資
品選注須二周歲滿日別無短少擬同隨朝例陞一等
二年省議上都應昌倉官比同萬億庫官例二周歲
為滿於應得資品上擬陞一等六年部議在都平準
行用庫官擬合與外路一體二周歲為滿元係流官內
選充者任回減一資陞轉萬億四庫知事例陞一等

提控按牘減資遷轉 和琳實保齊巴勒噶遜孔古烈

倉改立從五品提舉司提舉一員從五品同提舉一員
從六品副提舉一員從七品周歲為滿於到選人內選
充應得資品上擬陞二等任回遷用所歷月日通理
甘肅二路每處設監支納一員正六品倉使一員從六
品倉副一員正七品二周歲為滿於到選人內銓注入
倉先陞一等任滿交割別無短少又陞一等 受給庫
提領從九品副使受省割攢典合千人各設二名 七

年部擬大都路永豐庫提領從七大使從八副使從九
於到選相應人內銓注 江西省英德路河西務兩處
設立平準行用庫擬合設官員係從七以下人員依例
銓注 英德路平準行用庫提領一員從七大使一員
從八副使一員從九品 河西務行用庫大使一員從
八品副使一員吏部劄 甘肅行省豐備庫提領一員
從七品大使一員正八品於到選迤西資品人內陞等
銓注 大同倉官擬二周歲交代永盈倉例陞一等其

餘六倉任回擬減一資陞轉 八年部議湖廣行省所轄散府司吏充倉官依河南行省散府司吏充倉官比總管府司吏取充者降等定奪 至大二年部呈凡平準行用庫設官二員常平倉設官三員於流官內銓注以二年為滿依例減資 四年部議上都兩倉二周歲為滿於應得資品上陞一等歷過月日今後比例通理 皇慶元年部議上都平盈庫二周歲為滿減一資陞轉 延祐四年部議江浙行省各路見役司吏已及兩考選

充倉官五萬石以上比同考滿出身充典史一考陞吏目五萬石之下者於典史添一考依例遷叙 湖廣行省倉官如係路吏及兩考選充倉官一界同考滿出身充典史一考陞吏目遷叙庫官周歲准理本等月日考滿依例陞轉

凡稅務官陞轉至元二十一年省議應叙辦課官分三等一百錠之上設提領一員使一員五十錠之上設務使一員五十錠之下設都監一員十錠以下從各路差

人管辦 都監歷三界陞務使一週歲為滿月日不及者通理務使歷三界陞提領提領歷三界受省劄錢穀官再歷三界始於資品錢穀官并雜職任用 各處就差相副官增及兩酬者聽各處官司再差增及三酬以上及後界又增者申部定奪 二十九年省判所辦諸課增虧分數陞降人員增六分陞二等增三分陞一等其增不及分數比全無增者到選量與從優虧兌一分降一等 三十年省擬提領二年為滿省部於流官內

銓注一萬錠之上擬從六品五千錠之上擬正七品二千錠之上擬從七品一千錠之上正八品五百錠之上從八品大使副使俱周歲交代大使從行省吏部於解由合叙相應人內遷調副使從各路於本處係籍近上戶內公選至大三年詔定立辦課例一百錠之下院務官分為三等五十錠之上為上等設題領一員受省割大使一員受部割二十錠之上為中等設大使副使各一員二十錠之下為下等設都監同監各一員俱受

部劄並以一年為滿齊界交代都監同監四界陞副使
又四界陞大使又三界陞提領又三界入資品錢穀官
并雜職內遷用行省差設人員各添兩界陞轉仍自立
界以後為始理算月日並於有陞轉出身人員內定奪
不許濫用白身議得例前部劄提領於大使內銓注都
監同監本等擬注止依歷一十二界至大三年例後嗣
入錢穀人員及正從六品七品取廕子孫亦依先例陞
轉不須添界外其餘雜進之人依今次定例遷用通歷

一十四界依上例陞轉

至元九年部議凡總府續置提控案牘多係入仕年深
似比巡檢例同考滿轉入從九緣從九係銓注巡檢闕
提領案牘吏員文資出職難應捕捉兼從九員多闕少
本等人員不敷銓注凡陞轉資考從九三任陞從八正
九兩任陞從八巡檢提領案牘等考滿轉入從九從九
再歷三考陞從八通理一百二十月陞巡檢依已擬提
領案牘權擬六十月正九再歷兩任通理一百二十月

陞從九較之陞轉資考即比巡檢庶員闕易就都吏目
擬吏目一考轉充都目一考轉充提領案牘考滿依上
轉入流品都吏目應陞無闕止注本等職名驗理陞轉
二十年部擬提控案牘九十月陞九品 二十五年
部擬各路司吏實歷六十月吏目兩考陞都目歷一考
陞提控案牘兩考陞正九若依路司吏九十月吏目歷
一考與都目餘皆依上陞轉省擬江南提控案牘除各
路司吏比附腹裏路司吏至元二十五年呈准定例遷

除其餘已行直補并自行踏逐歷案牘兩考者再添資
遷除 三十年省准提控案牘補注巡檢陞轉資品不
相爭懸如已歷提控案牘月日者任回止於提控案牘
內遷叙 三十一年省議都目巡檢員闕雖不相就若
不從宜調用似涉壅滯下部先儘到選巡檢餘闕准告
銓注任回各理本等月日 大德二年省准京城內外
省倉典吏例於大都路州司吏縣典史內勾補二周歲
轉陞吏目除行省所轄外腹裏下州并雜職等衙門計

設吏目一百餘處其籍記未注者以次銓注俱擬三十
月為滿任回本等內不次銓注三年部擬提控案牘
都吏目有三周歲二周歲一周歲為滿者俱以三十月
為滿八年省准和琳兵馬司掌管案牘人等比依下
州合設吏目一員於籍記吏目外發補任回從九品遷
用添一資陞轉司吏量擬四名從本司選補通吏業
者六十月提控案牘內任用九年部呈都吏目已於
典史內銓注宜將籍記案牘驗歷仕以遠就近於吏目

闕內參注各理本等月日 十一年江浙省臣言各路
提控案牘改受勅牒不見通例部照江北提控案牘皆
自府州司縣轉充路吏請俸九十月方得吏目一考陞
都目都目一考陞提控案牘兩考正九品通理二百一
十月入流其行省所委者九十月與從九品今議行省
委用例革提控案牘合於散府諸州案牘都吏目并雜
職錢穀官內行省依例銓注通理月日陞轉之後行省
所設提控案牘都吏目合依江北由司縣府州轉充路

吏通理月日考滿方許入流

凡選取宣使奏差至元十九年部擬六部奏差額設數目每一十名內令各部選取四名九十月與從九品餘外合設數目俱於到部巡檢提領案牘都吏目內選取候考滿日驗下項資品銓注省准解由到部闕會完備人員內選取應入吏目選充奏差三考與從九品吏目一考應入都目人員選充奏差兩考與從九品都目一考應入提領案牘人員選充奏差一考與從九品巡檢

提領案牘一考選充奏差一考與正九品 二十六年
省准上都留守司兼本路都總管府典吏出身歷九十
月比通政院例合轉補本司宣使考滿依例定奪 二
十九年省議行省行院宣使於正從九品有解由職官
內選取如是不敷於各道宣慰司一考之上奏差本衙
門三考典吏內選取不敷於各道廉訪司三考奏差內
并本衙門三考典吏內選取仍須色目漢人相參選取
自行踏逐者亦須相應人員考滿例降一等須歷九十

月方許出職 內外諸衙門宣使以色目漢人相參九
十月為滿自行踏逐者降一等 凡內外諸衙門宣使
通事知印奏差都省宣使有關於臺院等衙門一考之
上宣使并有解由正從八品職官內選補如係都省直
選人員不拘此例仍須色目漢人相參選取自行踏逐
者考滿例降一等須歷九十月方許出職 樞密院宣
使正從九品職官內選取仍須色目漢人相參選用自
行踏逐者亦須相應人員考滿例降一等須歷九十月

方許出職 御史臺宣使正從九品職官內選取自行

踏逐者考滿例降一等須歷九十月方許出職 宣政

院宣使選補同 宣慰司奏差於本衙門三考典吏內

選取自行踏逐者考滿降等叙須色目漢人參用歷九

十月方許出職 山東運使奏差九月十月於近下錢穀

官內任用大都運司一體定奪 七年省准鞏昌等處

便宜都總帥府令史人等已擬依各道宣慰司令史人

等一體出身自行踏逐者降等叙有闕於本司三考典

吏內選取 八年部呈各寺監保本處典吏補奏差若
元係請俸典吏巴哩巴人等補充者考滿同自行踏逐
者降等叙 九年擬宣徽院典吏九十月補宣使并所
轄寺監令史 十年省擬中政院宣使於本衙門三考
之上典吏及正從九品職官內選用以色目漢人相參
自行踏逐者降等 十一年省擬燕南廉訪使奏差州
吏內選補考滿於都目內遷用 延祐三年省議各衙
門典吏須歷九十月方許轉補奏差

凡匠官至元九年工部驗各管戶數二千戶之上至一百戶之上隨路管匠官品級省議除在都總提舉司去處依准所擬 東平雜造提舉司并隨路織染提舉司二千戶之上提舉正五品同提舉從六品副提舉從七品一千戶之上提舉從五品同提舉正七品副提舉正八品五百戶之上至一千戶之下提舉正六品同提舉從七品副提舉從八品三百戶之上大使正七品副使正八品一百戶之上大使從七品副使從八品一百戶

之下院長一員同院務例不入流品量給食錢 凡一百戶之下管匠官資品受上司割付者依已擬充院長已受宣牌充局使者比附一百戶之上局使資品遞降量作正九資品 二十二年凡選取陞轉匠官資格元定品給員數提舉司二千戶之上者無之一千戶之上提舉從五品同提舉正七品副提舉正八品五百戶之上一千戶之下提舉正六品同提舉從七品副提舉從八品使副三百戶之上局使正七品副使正八品一百

戶之上局使從七品副使從八品一百戶之下院長一
員比同務院例不入流品工部議三百戶之上局副從
八一百戶之上局副正九遇有關於一百戶之下院長
內選充院長一百二十月陞正九正九兩考陞從八從
八三考正八兩考俱陞從七如正八有關別無資品相
應人員於已授從八匠官內選注通歷九十月陞從七
從七三考陞正七正七兩考陞從六從六三考正六兩
考俱陞從五為所轄司屬無從六名闕如已歷正七兩

考擬陞加從六散官止於正七匠官內遷轉九十月陞
從五如正六匠官有關於已授從六散官人員內選注
通歷九十月陞從五從五三考擬陞正五別無正五匠
官名關陞加正五散官止於從五匠官內遷轉如歷仕
年深至日斟酌定奪至元十二年以前受宣勅省劄人
員依管民官劄擬准已受資品十三年以後受宣勅省
劄人員若有超陞越等者驗實歷俸月定擬合得資品
上例存一等選用 管匠官遇有闕員去處如無資品

相應之人擬於雜職資品內應到選人內銓用 凡中原江淮匠官正從五品子從九品匠官內廕叙六品七品子於院長內叙用以匠官無從九品闕擬正從五品子應廕者於正九匠官內銓注任回理算從九月日二十三年詔管匠官其造作有好惡虧少勿令遷轉二十四年部言管匠衙門首領官宜於本衙門內選委知會造作相應人員區用勿令遷轉合依舊例從本部於常選內選差相應人員掌管案牘任滿交代遷叙

元貞元年准湖廣行省所擬三千戶之上提舉司從五品提舉從五品同提舉正七品副提舉正八品二千戶之上提舉司正六品提舉正六品同提舉從七品副提舉從八品一千戶之上局使正七品副使正八品五百戶之上局使從七品副使正九品五百戶之下院長一員

凡諸王分地與所受湯沐邑得自舉其人以名聞朝廷而後授其職至元二年詔以各投下總管府長官不遷

外其所屬州縣長官於本投下分到城邑內遷轉 四

年省剗應給印官員若受宣命及諸王令旨或投下官

員批剗省府樞密院制府左右部剗付者驗戶給印

五年詔凡投下官必須用蒙古人員 六年以隨路見

任并各投下叛差達魯噶齊內多女直契丹漢人除回

回輝和爾奈曼唐古同蒙古例許叙用其餘擬合革罷

曾歷仕者於管民官內叙用 十九年詔各投下長官

宜依例三年一次遷轉 省臣奏江南諸王分地長官

已令如例遷轉其間若有兼管軍鎮守為達嚕噶齊者一體代之似為不宜合令於投下長官之上署字一同蒞事二十年議諸王各投下千戶於江南分地已於長官內委用其州縣長官亦令如之似為相宜二十年諸王駙馬并百官保送人員若曾仕者驗資歷於州縣內相間用如無歷仕從本投下自用三十年各投下州縣長官三年一次給由互相遷轉如無可遷轉依例給由申呈省部仍牒廉訪司體訪大德元年諸

投下達嚕噶齊從七以下者依例類選 十年議各投
下官員非奉省部明文毋得擅自離職 皇慶二年詔
各投下分地城邑長官其常選所用者居衆人之上投
下所委者為添設其常選內路府州及各縣內減一員
三年以中下縣主簿錄事司錄掌判錢糧捕盜等事
不宜減去并增置副達嚕噶齊一員 四年凡投下郡
邑令自置達嚕噶齊其為副者罷之 各投下有闕用
人自於其投下內選用不許冒用常選內人

凡壕寨官至元十九年省部議都水監併入本部其壕寨官比依各部奏差出身大德二年擬考滿除從九品凡入粟補官天歷三年河南陝西等處民饑省臣議江南陝西河南等處富實之家願納粟補官者驗糧數等第從納粟人運至被災處所隨即出給勘合朱鈔實授茶鹽流官咨申省部除授凡錢穀官隸行省者行省銓注腹裏省者吏部注擬考滿依例陞轉其願折納價鈔者並以中統鈔為則江南三省每石四十兩陝西省每

石八十兩河南并腹裏每石六十兩其實授茶鹽流官
如不願仕而讓封父母者聽 陝西省一千五百石之
上從七品一千石之上正八品五百石之上從八品三
百石之上正九品二百石之上從九品一百石之上上
等錢穀官八十石之上中等錢穀官五十石之上下等
錢穀官三十石之上旌表門閭 河南并腹裏二千石
之上從七品一千五百石之上正八品一千石之上從
八品五百石之上正九品三百石之上從九品二百石

之上上等錢穀官一百五十石之上中等錢穀官一百石之上下等錢穀官 江南三省一萬石之上正七品五千石之上從七品三千石之上正八品二千石之上從八品一千石之上正九品五百石之上從九品三百石之上上等錢穀官二百五十石之上中等錢穀官二百石之上下等錢穀官 凡先嘗入粟遙授虛名者今再入粟則依驗糧數照依資品令實授茶鹽流官

陝西省一千石之上從七品六百六十石之上正八品

三百三十石之上從八品二百石之上正九品一百三十石之上從九品 河南并腹裏一千三百石之上從七品一千石之上正八品六百六十石之上從八品三百三十石之上正九品二百石之上從九品 江南三省六千六百六十石之上正七品二千三百三十石之上從七品二千石之上正八品一千三百三十石之上從八品六百六十石之上正九品三百三十石之上從九品 先嘗入粟實授茶鹽流官者今再入粟則依驗

糧數加等陞職 險西省七百五十石之上五百石之上二百五十石之上一百五十石之上一百石之上河南并腹裏一千石之上七百五十石之上五百石之上二百五十石之上一百五十石之上 僧道能以自衣鉢濟饑民者三百石之上六字師號都省出給二百石之上四字師號一百石之上二字師號俱禮部出給 四川省所轄地方富實民戶有能入粟赴江陵者依河南省入粟補官例行之其糧合用之時從長處置

江浙江西湖廣三省已糶官糧見在價鈔於此差人赴河南省別與收貯合用之時從長處置

凡獲盜賞官大德五年詔獲強盜五人與一官捕盜官及應捕人本境失盜而獲他境盜者聽功過相補獲強盜過五人捕盜官減一資至十五人陞一等應捕人與一官不在論賞之列

凡控鶴傘子至元二十二年擬控鶴受省劄保充御前傘子者除充拱衛都直指揮使司鈐轄官進義副尉

二十八年控鶴提控受勅進義副尉管控鶴百戶及一
考擬元除散官從八職事正九於從八內遷注 元貞
元年控鶴提控奉旨充舒庫爾齊一年受省劄充御前
傘子歷三百三十二月詔於從六品內遷用 大德六
年控鶴百戶部議於巡檢內任用其離役百戶人等擬
從八品傘子從七品 延祐三年控鶴百戶歷兩考之
上擬於正九品遷用

凡諤德齊至元二十七年定擬歷三十月至九十月者

並與縣達嚕噶齊進義副尉一百月以上者官敦武校尉至大二年令諤德齊權於州判縣丞內銓注三年令依舊例九十月除從七下縣達嚕噶齊任回添一資凡蠻夷官議播州宣撫司保蠻夷軍民副長官係遠方蠻夷不拘常調之職合准所保其蠻夷地分雖不拘常調之處而所保之人多有泛濫今後除襲替土官外急關久任者依例以相應人舉用不許預報違者罪及所由官司

元史卷八十二

元史卷八十二考證

選舉志二四年詔軍官有故今其嫡長子繼嫡長子亡
歿今嫡長孫為之 按原刻脫繼嫡長子四字今據
通考增

選舉志二大德元年省擬大都萬億四庫富寧庫寶鈔
總庫上都萬億庫官止依合得資品選注 按四庫
之庫原刻訛年合得之得原刻訛德今據元典章改
富寧之寧原刻作億考百官志但有富寧庫而無富

人見已居合
本八十二
億庫之名今據改

選舉志二其行省所委者九十月與從九品 按原刻
無從字今據元典章增

選舉志二三百三十石之上從九品 按元典章續通考
江南三省三百三十石之上授從九品以上又陝西
河南兩省相較自當以三百三十石為是原刻作二
百二十石今據改